

## Lesson 98

### Surga'

#### *Me' pinakita'u 21,22*

Assalamu alaikum me' bagayku mapakalehin. Tiya' ku katakdilan we' Tuhanin magaka-aka si ka'am. Iye Tuhan po'on kasanyanganin. Kabaya'annen, we' kēmon me' a'ahin tasabutde duk maglilla' nuhut lān bakas minemesnen, supaya a'ahin makajari kinimatan bentel we' ne duk supaya siye sinakup dem kasanyanganne te'edin salama-lama. Sinna kami we' makajari kami magpakale balik si ka'am ellew inin programabi inēnan “*Lānin duk a'ahin marjari bentel si matahan Tuhan*”.

Si lesson dehellu amban inin, mikil-mikil kite bi sabab **narka'**, lugal pagleggahan mangga' niya' tamanannen. Lugal la'at te'ed narka'in, pinapanjari para si Nakura' Seyitanin duk dara'akannen. Kēmon mangga'i mangatu manuhut lān pagtimbul minemes we' Tuhanin tapī la'i, pasape' amban Tuhan salama-lama! Iye pina'in dem Kitab Masutshin, pa'inne: “*Sasuku ga' talista ēnnen dem libru panulatan ēn me' a'a tege umul ga' tamanannen, ilakasan isab dem ebbut meylang kuwe' luha lamewin.*” (Me' pinakita'u 20:15)

Bugtu', bang a'ahin mikil-mikil ga' niya' pesōng la'at amban narka'. Saguwa' ellew inin, niya' dembuwa' istadihante hāp manamalan bang pinikil-pikil we' a'a, hāninen **surga'**.

Ekka magseddili-seddili tapikil me' a'ahin sabab surga', duk bang ine subey hinangden supaya siye umasek. Upama, me' sinduwehin tapikilde we' ekka ko' pangkatan surga'in duk magseddili-seddili hāpnen, duk surga' inge-inge ko' pamapihan siyehin, depende ko' si panumbas hinanganden. Me' sinduwehin tapikilde we' a'ahin subey dahu' palabey amban narka' duk bang ubus ne bayedande duseden, mangkin ne siye pinalinda hap surga'. Me' sinduwehin isab tapikilde we' surga'in lugal hinalli'an hadja we' Tuhanin para si a'a kapangandelan magāgamahin, duk we' surga'in lugal para pagkakanan, paginuman duk mekesinna-sinna. Ekka te'ed pikilan a'a magseddili-seddili bang sa'ingge surga'in duk bang sa'ingge a'ahin tapī. Saguwa' ellew inin duma'in pinayamanten **bang ine tapikil a'ahin** sabab surga'in, saguwa' **bang ine pina'in Tuhanin** sabab surga'in dem Lapalne masutshin!

Dem Kitab Kanabihanin ekka du ēn surga'in. Surga'in inēnan *Surga'*; *kursi Tuhanin*; *pana'anan Tuhanin*; *luma' Tuhanin*; *patenna'an Tuhan Masutsihin*; *Puweblo Masutsihin*; *Puweblo Tuhan Ma'ellumin*; *Awrusalam si surga'*; *patenna'an mala'ikatin duk Anak Bili-bilihin*; *pana'anan Panuhutanin si Isa duk sahayane mahadjehin*; *duk patenna'an me' a'a Tuhan tasulat ēnde si surga'in*. Panuhutanin si Isa ēnanne surga'in “*Luma' Samaku*,” pegge' iye pala'ihannen pag ga' pe iye inanakan tu'u si dunya.

Bang papandakte, surga'in **patenna'an Tuhanin**. Bakas takitete bi ne we' bisan intag-intag la'i du isab Tuhanin. Saguwa' masi du niya' lugal sutsi, sahaya, duk hāp manamal, tala pe amban diyata' langit, iye patenna'an Tuhanin dem sahayane duk balakatne. Si lugal iyan du isab ningkolo' Anak Tuhan Malangkewin, si Isa, diyata' kursine si kanawanan Mabalakatanin. La'i iye ngagad samanta'an ga' pe iye balik si dunya, ngahukum duk ma'ahuhan dunyahin. Inin du isab, surga'in lugal ibu-ibuhan mala'ikat paliput si kursihin, magsumbaya' duk a'a sakiyanan bakas ilekkat we' Tuhanin sabab laha' Bili-bilihin, hātinin Panuhutanin Isa AlMasi.

Si tuggu Kitab Injil, dem duwe kapitulu si jūd Me' pinakita'u, niya' pinabagala we' Tuhanin pu Yahiya, a'a kawakilannen, pakitehanne iye Puweblo Masutsi si Surga'in, iye bakas hininang we' Tuhan para si me' a'a sinulat ēnden dem libru pangalistahan ēn me' a'a tege umul ga' tamanannen. Pakale ka'am bang ine pina'in dem Kitabin sabab Puweblo surga'in, pa'inne:

(Me' pinakita'u 21) <sup>10</sup> *Manjari pagbaya'an ku we' Niyawa Tuhanin duk bino'o ku we' mala'ikatin pī diyata' punu langkew manamal. Pinakitehan we' ne si aku puweblo masutsihin ..... <sup>11</sup> Puweblo miya'an sinag we' sahayanya Tuhanin, ngillap kuwe' palmata mahalga' inēnan jasper, tilag kuwe' sāmin. <sup>12</sup> Niya' dindingne paliput subuk duk langkew. Sampuk-duwe gawangnen duk kaniya-kaniya gawang miya'an niya' mala'ikat nunggu'anne.....*

<sup>16</sup> *Puweblo miya'an pasagi', sali' taha'annen duk luhahannen....*  
<sup>19</sup> *Me' batu pabettadan dinding puweblo miya'an pinalmatahan duk kēmon bayu'-bayu'an palmata mahalga'..... <sup>21</sup> Duk hinang tambelan sampuk-duwe gawangin sampuk-duwe mutsa'. Dambuwa' gawang dambuwa' isab mutsa' hinang tambelnen. Duk me' lān si puweblo miya'an bulawan ga' niya' saget-sagetne, tilag kuwe' sāmin.*

<sup>22</sup> *Ga' ku ngite langgal dem puweblo miya'an pegge' i' ne la'i Tuhanin, Panuhutan Mabalakatanin duk Bili-bilihin (hātinin, Panuhutanin Isa AlMasi). Hangkan ga' ne niya' kagunahan langgalin la'i. <sup>23</sup> Duk la'i si puweblo miya'an ga' niya' kagunahande si danta'*

ellewin atawa bulanin pegge' **sahaya Tuhanin** mangurung danta' si siyehin duk payita'anden Bili-bilihin. <sup>24</sup> Kadanta'an we' sahaya si puweblo miya'an kēmon me' a'a maglengngan si dunyahin..... <sup>25</sup> Me' gawang si puweblo miya'an luka kēmon ellew. Ga'i ne tinambel-tambel pegge' ga' ne niya' sangem la'i..... <sup>27</sup> **Saguwa' ga' niya' sammal umasek pī dem puweblo miya'an. Ga' niya' me' a'a maghinangan maka'iya'-iya' atawa magdusta' umasek pī. Luwal hadja siye ma'umasek pī dem puweblo miya'an bang ēnden tasulat dem libru suku' si Bili-bilihin, iye libru pangalistahan ēn me' a'a taga umul ga' tamanannen.**

(Me' pinakita'u 22) <sup>1</sup> **Pinakitehan isab si aku we' mala'ikatin bohe' mangurung umul ga' tamanannen. Bohe' inin tilag kuwe' sāmin duk paselluy amban kursi Tuhanin duk Bili-bilihin,** <sup>2</sup> **duk nelluy si mata lān puweblo miya'an. Kaduwembiya' higad bohe' miya'an niya' kayu, iye kayu mangurung umulin. Dem dan tahun kayu inin buwa' minsampuk-duwe, mintedde kahaba' bulan....** <sup>3</sup> **Ga' niya' takasuwa' la'i dem puweblo miya'an ine-ine kamulka'an Tuhanin. [Ga'i ne a'ahin matey-matey. Ga' ne niya' magdukka duk magtangis duk ga' ne niya' peddi'an. (Me' pinakita'u 21:4)] La'i kursi Tuhanin duk Bili-bilihin duk la'i me' dara'akannen mudji iye.** <sup>4</sup> **Takitede du luwe Tuhanin duk tasulat ēn Tuhanin diyata' me' lendo'de.** <sup>5</sup> **Ga' ne niya' sangem la'i duk ga'i ne siye ngangguna payita'an atawa danta' ellewin pegge' Tuhanin, Panuhutanin, iye ne danta'den. Duk magsultan siye salama-lama.**

Sa miya'an pinakitehan we' Tuhanin pu Yahiya Puweblo Masutsi minemesne para si a'a mamene' nuhut lāne pagtimbulin. Manjari, kuwe'itu pikilte pe sabab bang ine pina'in Tuhan dem Lapalnen sabab **lān tudju Surga'in.** Sa'ingge kabugtu'ante we' pī kite hap Surga' duk duma'in hap narka'?

Ta'essebbi ke bang ine pina'in Isa AlMasi si me' tindeggen sabab luma' Tuhanin duk lān tudju luma'nen? Pa'inne si siye:

(Yahiya 14) <sup>1</sup> **Da'a ka'am suse dem ateybi sabab me' pina'inku miya'an. Sandel ka'am si Tuhan duk sandel isab ka'am si aku.** <sup>2</sup> **La'i si lahat Samaku Tuhanin, ekka patenna'an. Bang inin ga'i to'o ga'i ka'am akahanku. Pī ku manyap patenna'anbin.** <sup>3</sup> **Manjari bang ubus ne ku magpanyap patenna'anbin, balik du ku pitu ngeddo' ka'am duk bo'ote ka'am pī si patenna'ankun duk kite bi magdambuwa' patenna'an.** <sup>4</sup> **Duk kata'uhanbi du lān hap pī si papihankun....** <sup>6</sup> **Aku inin lān tudju Tuhanin, aku po'on sasuku mabennalin, duk aku po'on umulin. Ga' niya' tapī si Samaku Tuhanin bang duma'in aku palabeyannen.**

Iye pina'in we' Isa AlMasihin. Iye dihananne **Lānin.** Sine-sine ga'i hap pī palabey amban Anak Tuhan Malangkewin, hātinin Mangelekkat

masutsihin, ga'i te'ed tapī si pala'ihan sutsi Tuhanin. **Ga'i te'ed tapi!** Iye hep pina'in dem Kitabin, pa'inne:

*“Asal iye hadja dendangan makatimbul kitehin bi. Pegge' tu'u si tibu'ukan dunya inin, ga' niya' seddili pangurung we' Tuhanin makatimbul kite bi luwal si Isa hadja.”* (Hinangan 4:12) *“Dembuwa' du hadja Tuhanin duk dembuwa' du isab hadja mapasellet si Tuhan duk manusiya'in maghāp siye, iye Isa AlMasi pagkasite bi manusiya'. Paglilla'ne umulnen duk pinaganti' we' ne dinen supaya manusiya'in ga'i legga Tuhanin sabab duseden...”* (1 Timoteo 2:5,6)

Mapaselletin, Isa AlMasi mapitu amban Tuhanin, iye **Lān Pagtimbul** tudju hap Surga'in. Hangkan iye inanakan tu'u si dunya, supaya tabo'one madusehanin pī si Tuhan. Ga' niya' duse-dusene tiggellanne ellum tu'u si dunya, bu'usanne laha'nen hinang Kurban ga' niya' salla'-salla'ne pamuwas duse, duk ellum iye balik amban kamateyne katellu ellewnen. Ga' niya' tapī si Tuhanin, luwal bang palabey amban Isa AlMasi. Kahagadnu ke iyan? Takitenu ke we' Isa AlMasi hadja **Lānin, bu ga' niya' seddili** mo'o madusehanin pī si pana'anan Tuhanin? Kaw hāp pe bang pahātite inin si dembuwa' istori.

Manjari, niya' ko' dembuwa' lella patenna'annen tala dem gulangan, dem kakulangan luma' te'ed. Lella miya'an bangsa magsollet hadja. Lella inin niya' bulakne suga' kiput du, duk maghinang iye si bulakne inin. Saguwa' niya' a'a, basagan amban iye, tekka, patahala'ne a'a mamiskin miya'an duk eddo'ne bulaknen. Ga' ne niya' pagtanemanne duk ga' isab niya' nabangan iye supaya ta'eddo'ne balik bulaknen, pegge' ga' niya' pagbayedne.

Dembuwa' ellew tapikilne we' subey iye pī hap kapital lahatne miya'an pī si Presidentehin, māku tabang si iye, pegge' bakas takalene we' mangantan lahatnen bentel duk ma'ase'. Hangkan pī ne iye duk lumengngan ne ga' tamanan. Ujudnen tekka du iye si puweblo pala'ihan astana' Presidentehin. Na, hadje te'ed luma' miya'an duk hāp! Pag tekka iye si tarangka luma'in, **pasuley ne iye pa'asek**, saguwa' magsollet pe iye duk lemmit. Pa'in guwaldiya si tarangkahin: “Hoy! Sōng tungannu?!” Nambung iye, pa'inne, “Mabaya' ku pī si Presidentehin.” Ubus pa'in guwaldiyahin si iye, “Ah, pa'innu ke we' a'a kuwe' ka'u iyan makajari hadja pa'asek tu'u, bang mabaya'? Payamanun be dinu lu! Ga'i ke kata'uhannu we' ga'i kew makajari padiyalem tu'u bang kuwe' ka'u iyan magkuwantang duk lemmit? Tahala' kew pī, bang ga'i kew tahala' siggewte kew bu pinademkalabusu!”

Hangkan pabira ne a'a miskin miya'an duk tahala', saguwa' ga' du iye suse manamal. Pī iye magpāku limus kekkohapan. Ubus pī ne iye melli semmek mura, mandi, bu magsemmek bu balik pī si astana'

presidentehin. Pag tekka iye balik si tarangkahin, pa'in guwaldiyahin si iye, “Uy, niya' ne semmeknu? Saguwa' ga'i du sarang hāpnen bo'onu pī si harapan mangantanan lahat inin. Duk bisan pe hāp manamal semmeknun, masi du kew ga'i makajari padiyalem, pegge' **niya' subey pilmiso spesiyal** bang kew pa'asek si luma' Presidente. Ga' niya' kapatutnu pa'asek! Tahala' kew!”

Pag kalene inin suse ne iye, pa'inne, “Sa'ingge ne ku inin? Ekka ne kasusehan talabeyku bu masi pe ku ga'i tapī si Mangantanan lahat inin!” Ga' ne niya' ase-asene duk ningkolo' hadja iye si higad lān. Saguwa' sasangde magbissā duk guwaldiyahin, takite iye we' Mangantanan lahat miya'an. Bu Mangantanan lahat miya'an, la'i du isab anakne sakahin. Pa'inne si anaknen, “Pī kew duk tilewun bang ine kabaya'an lella miya'an.” Pag tekka anaknen si lella miya'an, ningkolo' iye si bihingne duk tilewne iye, pa'inne, “Tuwan, makajari ke ku nabangan ka'u? Ine jānnen hangkan kew pitu duk ine jānnen hangkan kew suse?” Pa'in lellahin, “Mabaya' ku pī si Mangantanan lahat inin, saguwa' ga'i makajari. **Hinangku ne kēmon supaya ku tapī saguwa' ga' niya' kagunahanne!**”

Pa'in anak Presidentehin si iye, “Aku anak Mangantanan lahat inin duk dina'ak ku we' samakun pitu nabangan ka'u. Nuhut kew aku.” Hangkan magtuhut ne siye pī si tarangka astana' Presidentehin. Pag tekka siye si guwaldiya bakas ga'i manganda'ak a'a mamiskin mapa'asekin, nalura guwaldiyahin pahadjene siye sasangde mapalabey amban tarangkahin pī si lame astana'in. Inurungan lella mamiskinin we' anak Presidentehin juba hāp manamal dina'ak inasek si iye, duk magtuhut siye pī padiyalem astana' Presidentehin. Sa miya'an umasek lellahin si astana' Presidentehin duk magkasuwa' duk Mangantanan lahatin, **sabab tabang duk kapatut anak Mangantanin.**

Me' bagayku, sa miya'an du isab kēmon mamabaya' padiyalem Surga'in, astana' Sultan me' sultanin. Tuhan, Mangantanan Alamin bangsahan duk sutsi. Ga'i makajari we' pī hadja kite bi pa'asek si pana'ananne masahayahin sa'ingge-sa'ingge ne hadja! Bang sabab di hinangante bisan hāp manamal, ga'i kite bi tapī si pana'ananne. Kēmon kite bi kuwe' a'a mamiskin miya'an suleyanne padiyalem pī si pana'anann Presidentehin sabab di hinangannen. Pa'in Kitab:in: “*Kēmon kite bi manjari haram ne, duk bisan me' hinangante mabentelin kuwe' tarapu kelemmi'-lemmi'.*” (Shi'ya 64:6) Surga'in lugal sutsi, duk “*ga' niya' sammal duk me' a'a maghinangan maka'iya'-iya' atawa magdusta' umasek pī!*” (Me' pinakita'u 21:27) **Ga' niya' makajari nabangan kite bi pī si lugal sutsi iyan luwal hadja Dembuwa' Masutsihin pitu amban lugal miya'an!** A'a sutsi miya'an **Isa AlMasi**, Anak Tuhan Salama-lama Mabalakatanin, iye Bili-bili Tuhanin mapitu amban Surga'in, matey manjari kurban

pamuwas duse, duk ellum balik amban kamateynen duk balik pī hap Surga'!

Manjari, sine makajari tapī hap Surga'in? Luwal me' a'a ilimpiyuhan ne **sabab sandelde** pu si Isa Mangalekkatin duk sabab laha' binu'usannen. Luwal du siye makajari padiyalem Surga'in! Iye pina'in dem Kitabin pag pa'inne:

*“Ga'i a'ahin pinagbidda' we' Tuhanin. Sali'-sali' kēmon kapagduse, bisan dambuwa' ga' niya' siye tapudji we' Tuhanin. Saguwa' sabab lasa duk ase' Tuhan si kitehin bi, iye lasa-lasahanne si kitehin bi, hangkan inampun we' ne duseten bi duk kinimmatan kite bi bentel we' ne, pegge' sandel kite bi pu Isa Almasi, mangalekkat kite bi amban duseten bi. Pinapitu we' Tuhanin Isa Almasi supaya iye matey duk bu'us laha'nen duk sabab kamateyne miya'an inampun du duse me' manusiya'in bang siye sandel si iye.”* (Roma 3:22-25) *“Kahagadte bi panaksi' manusiya'in. Pasōng basag panaksi' Tuhanin duk iye inin panaksi' Tuhan sabab Anaknen. Sasuku sandel si Anak Tuhanin kata'uhanne dem ateyne we' si Isa asal Anak Tuhanin. Saguwa' mangga'i makahagad si Tuhanin kuwe' pa'inne we' magdusta' Tuhanin pegge' ga'i kahagadne panaksi' Tuhan sabab Anaknen. Iye hep inin panaksi' Tuhanin we' ka'urunganne kite bi umul ga' tamanan, duk umul salama-lama inin ka'urungan kite sabab Anaknen. Hangkan sasuku pala'ihan Anak Tuhanin taga umul inin. Saguwa' sasuku ga'i pala'ihan Anak Tuhanin, ga' niya' umulne salama-lama. Sulatante ka'am inin supaya kabugtu'anbi we' taga umul du ka'am salama-lama. Sulat inin para si ka'am me' masandel si Anak Tuhanin.”* (1 Yahiya 5:9-13)

Ka'u, mapakale ellew inin, **kata'uhannu** ke we' tege umul kew salama-lama? Bugtu' ke kew we' tapī kew hap surga' duk magsinna-sinna si pana'an an Tuhanin salama-lama? Sandel ke kew si Anak Tuhanin? Tasulat ke ēnnun dem libru suku' si Bili-bilihin, iye libru pangalistahan ēn me' a'a taga umul ga' tamanannen?

Mikil ko' kew pāhap-hāp sabab me' bakas tabatsate ellew inin, pegge' mabaya' Tuhanin ngurungan ka'u kata'u sabab kēmon inin....

Karayaw iledjiki'an kew we' Tuhanin sasangnu mikil-mikil sabab ayat amban dem Kitabne masutsi inin, pa'inne:

*“Niya' panyap Tuhanin para si me' malasa si iyehin. Pinanyapne inin ga' niya' a'a bakas makakitene, atawa makakalene. Ga' niya' bisan bakas makapikilne!”* (1 Korinto 2:9)

Wassalam